

peremunt, phalangium appellatum, et in nidos suos ferunt, deinde inlinunt, et ex iis incubando suum genus procreant. Praeterea omnes carne uescuntur contra quam apes, quae nullum corpus attingunt. Sed uespae muscas grandiores uenantur, amputatoque iis capite reliquum corpus auferunt. Crabro- 73 num siluestres in arborum cauernis degunt; hieme ut cetera insecta conduntur; uita bimatum non transit. Ictus eorum haut temere sine febri est. Auctores sunt ter nouenis punctis interfici hominem. Aliorum, qui mitiores uidentur, duo genera: opifices, minores corpore, qui moriuntur hieme, matres, quae biennio durant; hae et clementes. Nidos uere faciunt fere 74 quadrifores, in quibus opifices generentur. His eductis alios deinde maiores nidos fingunt, in quibus matres futuras producant iam: tum opifices funguntur munere et pascunt eas. Latior matrum species, dubiumque an habeant aculeos, quia non egrediuntur. Et iis sui fuci. Quidam opinantur omnibus his ad hiemem decidere aculeos. Nec crabronum autem nec uesparum generi reges aut examina, sed subinde renouatur multitudo subole.

XXV (22). Quartum inter haec genus est bomby- 75 cum, in Assyria proueniens, maius quam supra dicta. Nidos luto fingunt salis specie, adplicatos lapidi, tanta